

TARIKH	MEDIA	RUANGAN	MUKA SURAT
3/11/2021	MALAKAT TRIBUNE	BERITA SEMASA	

## MAFI lancar dana RM60 juta untuk usahawan agro-makanan negara



Majlis Mempromosikan Dana Modenisasi Rantaian Nilai, Pemodenan Vesel Dan Mekanisasi Tangkapan yang dirasmikan oleh Dr. Ronald Kiandee di Dewan Tan Sri Abu Zahar, Menara Pertubuhan Peladang (LPP) di sini semalam.

**KUALA LUMPUR** : Kementerian Pertanian dan Industri Makanan (MAFI) melalui Agrobank melancarkan Majlis Mempromosikan Dana Modenisasi Rantaian Nilai, Pemodenan Vesel Dan Mekanisasi Tangkapan di Dewan Tan Sri Abu Zahar, Menara Pertubuhan Peladang (LPP) di sini semalam.

Program itu bertujuan memudahkan akses pembiayaan usahawa di seluruh rantaian agromakanan dari peringkat hulu hingga hiliran dengan menawarkan kadar pembiayaan menarik dan berisiko rendah.

Majlis dirasmikan oleh Menteri Pertanian dan Industri Makanan, Datuk Seri Dr. Ronald Kiandee yang turut dihadiri Pengerusi Lembaga Pertubuhan Peladang (LPP), Datuk Che Abdullah Mat Nawi dan Pengerusi Agrobank, Datuk Mustapha Buang.

Dr Ronald berkata, melalui Dana Modenisasi Rantaian Nilai Agromakanan berjumlah RM60 juta itu, usahawan berpeluang mendapatkan perolehan peralatan dan teknologi berteraskan Revolusi Perindustrian Keempat (4IR) sehingga RM1 juta pada kadar 3.5 peratus setahun bagi tempoh sehingga 10 tahun.

“Antara teknologi berteraskan 4IR yang menjadi fokus dalam sektor agromakanan adalah teknologi sensor, robotik, dron, blockchain dan lain-lain teknologi yang merupakan elemen bagi konsep pertanian pintar.

“Pada masa yang sama, MAFI juga memperuntukkan sebanyak RM150 juta bagi kemudahan pembiayaan di bawah Program Pemodenan Vesel dan Mekanisasi Tangkapan bagi Vesel Zon A, Zon B serta telah diperluaskan kepada Zon C dan Zon C2,” katanya.

Ronald berkata, daripada jumlah tersebut, sebanyak RM104.5 juta diperuntukkan di bawah skop Pemodenan Vesel manakala RM45.5 juta lagi diperuntukkan di bawah skop Mekanisasi Tangkapan dengan kemudahan pembiayaan pada kadar di antara 3.0 sehingga 3.5 peratus bagi tempoh maksimum 10 tahun.

Katanya, program itu bertujuan membuka peluang kepada nelayan tempatan menaik taraf dan memodenkan vesel dari aspek keselamatan dan peningkatan hasil tangkapan.

“Dengan adanya vesel moden yang selesa dan selamat, golongan belia lebih berminat untuk menceburkan diri dalam sektor perikanan tangkapan seterusnya mengurangkan kebergantungan negara terhadap tenaga kerja asing,” katanya.

Ronald berkata, inisiatif itu juga seiring dengan Rancangan Malaysia Ke-12 (RMKe-12) yang mengiktiraf sektor pertanian pintar sebagai aktiviti strategik dan berimpak tinggi yang menjana pertumbuhan ekonomi negara.